



▶▶▶ Od početka 2010. godine cigarete u BiH prodaju se po novim maloprodajnim cijenama, formiranim u skladu sa Odlukom o utvrđivanju posebne i minimalne akcize na cigarete. Ova Odluka, koja se primjenjuje od 1. januara 2010. godine, podrazumijeva da će se akciza na cigarete obračunava na sljedeći način: proporcionalna akciza po stopi od 42 posto, te posebna akciza u iznosu 0,30 KM za pakiranje od 20 komada.

▶▶▶ Vrijednost izvršenih građevinskih radova u novembru 2009. godine, u odnosu na prosječnu vrijednost prošle godine, manja je za 30,1 posto, dok je u odnosu na isti mjesec prošle godine manja za 43,6 posto, podaci su Federalnog zavoda za statistiku. U novembru 2009. godine ukupni izvršeni građevinski radovi iznose 657.804.000 KM.



▶▶▶ Ekonomski fakultet u Sarajevu, povodom promocije novog broja Zbornika radova, organizirao je prigodnu izložbu koja se sastoji iz tri cjeline. Kako je saopćio EFSA, u prvju su izložena sva izdanja zbornika radova ovog fakulteta, od prvog broja koji je objavljen 1966. godine, do najnovijeg, 29. broja iz 2009. godine.



▶▶▶ Zavisno društvo Rudnik mrkog uglja Zenica okončalo je 2009. godinu sa ukupno proizvedenih 307.810 tona uglja, što je 85 posto u odnosu na planiranih 360.000 tona. U decembru prošle godine ukupno je proizvedeno 26.900 tona uglja, što je 107 posto u odnosu na planiranih 25.000 tona.



▶▶▶ Rudnik mrkog uglja Kakanj realizirao je Operativni plan proizvodnje za 2009. godinu od 1.174.000 tona uglja, izjavio je generalni direktor ovog rudnika Mirsad Jašarspahić. Prema njegovim riječima, proizvodnja uglja ostvarena je iz podzemnih kapaciteta Jame Haljinići u iznosu od 360.000 tona, te sa Površinskog kopa Vrtlište 814.000 tona.



▶▶▶ Štedno-kreditni sektor u Republici Srpskoj u prvih devet mjeseci 2009. godine poslovao je sa gubitkom od 24.000 KM. U izvještaju Agencije za bankarstvo RS za treći kvartal prošle godine navodi se da su sa gubitkom od 26.000 KM poslovale tri štedno-kreditne organizacije, dok je jedna ostvarila dobit u iznosu od 2.000 KM.

▶▶▶ F-Autocentar SA proteklu godinu završio je sa prodajom 1.055 vozila, što za proteklu, vrlo turbulentnu godinu, predstavlja pravi uspjeh. Od ukupnog broja prodatih vozila brend Ford prednjači sa 823 prodata modela, zatim slijede brendovi Mazda sa 153 prodata vozila i Volvo sa prodatih 39 modela, dok listu zaključuje Land Rover sa 23 prodata modela. Što se tiče prodaje dvotočaka, u F-Autocentru SA prodato je 10 Generic skutera i četiri KTM motocikla.

